

Date – 27/05/2024

Time - 18:30 Hrs

1. Chite Lui humhalh tur a hmalakna chungchangte chiang zawk a hre turin Chief Minister Pu Lalduhoman Save Chite Lui Executive Committee aiawhte a kawm.
2. Hnahthial ah Vaimim eichhetu Pangang, Fall Army Worm hmuhchhuah thar a ni a, kuminah hriat vawi khatna a ni.
3. Gujarat sawrkar chuan Rajkot-a TRP game zone kang thubuaiah police officer pahnih tiamin official pasarih an hna atangin a chawlhtir.
4. External Affairs Minister Dr. S. Jaishankar-a chuan Papua New Guinea-a leimin avanga mi tam tak an thi chu pawl a tih thu a sawi.

<><><>

CM

Chite Lui humhalh tur a hmalakna chungchangte chiang zawk a hre turin Chief Minister Pu Lalduhoma chuan a pisa-ah Save Chite Lui Executive Committee aiawhte a kawm a, an hmalak tawhna hrang hrangte a ngaithla a, an hmachhawp bawhzui dan turte a sawipui bawk a.

Save Chite Lui Executive Committee hruaitute chuan Chite Lui tana beihna (Save Chite Lui Movement) chu kum 2007 a bul tan a nih thu leh kum 2017 atanga awmze nei leh zual a kalpui chhoh zel a nih thu an sawi a. Comprehensive Action Plan a ruahman sa angin hmalakna kalpui a nih thu leh Action Plan Phase I chu zawh chhoh mek a nih thu Chief Minister hnenah an hrih a. Phase I chhunga hmalakna hlawm lian zingah Baseline Survey te, nasa taka public awareness siam leh dan hmang a lui humhalhte chu hlawhtling tak a hlen chhuah a ni tih tarlan a ni a.

Chite Lui hi Indian Army in Adopted River atana an thlan thute, Prime Minister Radio Programme Mann ki Baat (MKB) ah tarlan a nih thute, MKB ah tarlan a nih avangin sorkar laipui atangin duhsakna leh chhawmdawlina tam tak a awm theih dante sawiho a ni a. Save Chite Lui Movement avanga Mizo mipuite thinlungah kan ram a luite humhalh duhna kawng a harhtharna a lo piang zel leh note engemawzat a hring zelte hi chanchin lawmawm a nih thu tarlan a ni.

Action Plan Phase II angin Riverfront Development atan sorkar laipui atanga sum hmuh dan tur sawiho a ni a. Bawngkawn ram a Chite Lui hnar atanga Bethlehem Vengthlanga World Bank Road-a PWD Lei (bridge) thleng a Chite Lui kam tuak rural zel tur venna tura lungrem dan turte sawiho a ni bawk a.

Chief Minister leh Save Chite Lui Coordination Committee Chairman ni bawk hova thutkhawm zui chungchang pawh sawiho a ni bawk a ni.

<><><>

HOME COMMISSIONER

Home Commissioner Pu H. Lalengmawia chuan state pawna Mizoram Police duty mi 1047 ten Lok Sabha inthlana vote an thlak theih nan theihtawp chhuah mahse Mizoram Police te chu inthlan puan hnuah ECI thuhnuaia awm annih avangin tih theih an nei lo tih a sawi a, Police te vote thlak theih loh chhan mi thenkhatin state sawrkar inthlahdah vang an tih chu vanduaithlak a tih thu a sawi.

He thu hi wawiina Chief Secretary Conference Hall-a thuthar thehdarhtute an kawmna ah sawiin inthlan puan anih atangin Election Commission thuhnuaia awm annih angin state sawrkar a inrawlh vek a remlo a ti.

Mizoram DGP Anil Shukla sawi danin Mizoram Police 1047 te chu tun thlengin State dangah Parliament inthlan duty in an awm a, heng te hi Sawrkar laipua Ministry of Home Affairs thupek angin duty turin March ni 28, ni 29 leh ni 30 ah te chhuahtir tura thupek an hmu a, CEO hnenah postal ballot in vote thlak an dil a, nomination hnuh let hma chuan postal ballot hmangin vote thlak theih a ni lo a, an tihchhuah hnuah chauh Nomination withdraw hun a tawp a ni.

Mizoram CEO kaltlangin ECI thlengin vote thlak anih theih nan theihtawp an chhuah tih sawiin vote an thlak dan kawng a awmlh avangin pawl a tih thu a sawi.

<><><>

GOVERNOR

Vawiin khan Governor Dr. Hari Babu Kambhampati chuan High School Leaving Certificate leh Higher Secondary School Leaving Certificate Examination 2024-a pakhatnate leh an nu leh pate chu Raj Bhavan a lengah a sawm a. He hunah hian Governor chuan HSLC-a pakhatna leh HSSLC arts, commerce leh science stream-a pakhatnate hnenah chawimawina thuziak leh lawmpuina sum fai a hlan a ni.

Governor Dr. Hari Babu Kambhampati chuan zirlai titha te hi a mal te tein a kawm a. Lehkha zir chhunzawm an tum dante zawtin, hna leh eizawna chungchange te a sawipui a ni. Governor chuan zirlai tithazual te chu a lawmpui tih a sawi a, an thiamnate chu an hmalam huna hna tha tak leh eizawna ngelnghet tak an neih theih nana hmang turin a fuih baw a ni.

<><><>

AIZAWL COUNTING PREPAREDNESS

Aizawl DC Pi Nazuk Kumar chuan June ni 4-a vote chhiar turin inbuatsaihna kalpui mek ani a ti a, Aizawl District ah chuan hmun 3 ah vote chhiar tur niin counting hall 12 ah vote chhiar ani dawn tih a sawi.

Akashvani corr nena an inkawmna ah he thu hi sawiin Parliament inthlana Mizoram Returning Officer Pi Nazuk Kumar chuan June ni 4-a vote chhiar turin chak takin inbuatsaihna kalpui ani a ti a, Aizawl District ah chuan DC Office, Assembly Annexe ah leh Govt Aizawl College ah chhiar tura ruahman ani tih sawiin counting hall 12 ah chhiar tur niin hmun 114 ah mi 500 velin vote an chhiar dawn tih a sawi.

Returning Officer chuan Vote chhiarna hmuna duty tur te chu training pek vek tura tih angin vawi khat an training chhuak vek tawh a ti a, vawi 2 training nei tura ruahmanna kalpui mek ani tih sawiin tunkar chhunga training neih leh tum a ni a ti baw.

<><><>

FAW

Hnahtial ah Vaimim eichhetu Pangang, Fall Army Worm hmuhchhuah thar a ni a, kuminah hriat vawi khatna a ni.

Vaimim eichhetu pangang Fall Armyworm hi School of Agricultural Sciences (SAS) zirlai naupang ten thlai an chin Vaimim hmun ah hmuh a ni a, an Vaimim chin te hi organic leithaa chawm leh chemical leithaa chawm, hmun hnihah an siam a, organic leithaa chawmna hmun bikah hian fall armyworm hi a awm duh bik ni a an hriat thu SAS zirtirtu pakhat chuan a sawi.

Thuneitute chuan pangang puang tur vengin theih tawp an chhuah mek tih an sawi a, tirem tur hian rannung thahna hlo hmang lovin, thang an kam a, hei hian he rannung puang nasa lutuk tur a ven theih an beisei thu an sawi.

Fall armyworm hi kum 2019 atang khan kumtinin Mizoramah a puang thin a, vaimim hmun a bei ber a, vaimim eitur a hmuh loh chuan thlai dang pawh a bei chhunzawm mai thin tih mithiamte chuan an sawi a ni.

<><><>

CYCLONE

Mizoram hmun hrang hrangah vawiin hian ruah a sur a, khawchin thlir lawktu State Meteorological Centre puan lawk angin Bay of Bengal tuipui atanga Cyclone si per chuan Mizoram pawh arawn tuam mek a,

Khawchin thlir lawktute hian hmun thenkhat chuan thli leh ruah hi tam tham deuh thawk thei a nih avangin mipuite chu fimkhur turin an chah a, chutihualin chiaina tur erawh a awm lo niin an sawi thung.

Furpui chhunga ruahsur nasa leh thlipui tleh avanga chhiatna hrang hrang thleng thei laka an him theih nan, mipuite chu mahni In leh lo te thli leh ruah dawl thei turin a tul anga thawmtha tur leh rangva leh thil dang thlawk thei awmte hmun him lama senghawi turin an ti a, tuichhe paihna leh tuihawk luankawr te mumal taka siam turin an ti baw.

Sorkar thuchhuah tarlan dan chuan, mahni In leh a velah leimin mai thei a awm a nih chuan Silpaulin-a khuh hul that tur a ni a, thlipui laka In him tawk loa cheng te chu hmun him lama insawn chhuak rih turin a ngen. Thli leh ruah thawh hun lainn Lui, tui hmun leh ramhnuai a te kal loh turin mipui a hriattir bawka ni.

Cyclone chungchangah mipui chu Thudik tawk lo leh thu belhchian dawl lo thehdarh lo turin a ti a ni.

Tukin khan Lawngtlai District Mualbu 'L' a Upper Primary School Building chu thliin a chhem tlu a. Mualbu 'L' a YLA hruaitute hnen atanga thudawn danin UPS Mualbu 'L' Building hi kum 2006 a sak a ni a. A building hi a chhiat tawh em avangin ruah a sur a, thli a thawt chuan sikul kal ngam a ni ngai lova kum tam tak hetiang hian fura luah ngam lohin a lo awm tawh thin a ni.

Mualbu 'L' UPS Headmaster Pu Zolalsanga chuan School Building atah tawhloh avangin khua a chhiata thli thawk thei tur dinhmuna a awm chuan school pawh an kalpui ngam lo thin a, Cyclone warning thuchhuah an hmuh avangin vawiin hian school kallo mai turin naupang an hriattir a, school kal se, chhiatna liantham zawk pawh a thleng thei mai thei a ni a ti. Mualbu 'L' UPS ah hian Class V atangin Class VIII thleng awmin Zirlai 31 an nei mek a ni.

Tunlai a ruah sur nasa vangin Lawngtlai tuilakna Chhimtuipui chu a nu nasa viau a, Chengpawngli, Chhimtuipui ami a pum tlakloh a tui an lakna thin Chengkawllui pawh ruah a tlak hlek chuan pump tlakloh in a nu bawka, heivang hian PHE Department chuan Lawngtlai ah tui semtur mumal an neilova, tuisem pawh a khaihlak nasa chho tan a, ruah tui khawl lam ah tanla turin Department chuan mipui an chah a ni.

<><><>

PC PARTY & AAP

People Conference PC Party leh AAP Mizoram ten MLA 16, Dan kalha an thuneihna piah lama nihna chelha an hriat avangin dan ang hma la turin Assembly Speaker Pu Lalbiakzama hnenah lehkha an theh lut.

Party pahnih te hian vawiin khan Assembly Speaker Pu Lalbiakzama hnenah lehkha hi an theh lut a, PC Party President Pu Vanlalruata sawi danin, dan ang chuan, MLA pakhat tan Assembly Subject Committee pakhatah bak a tel theih loh lainn tun dinhmuna MLA 16 te chu Subject Committee pakhat aia tamah an awm mek a ni.

Hei bakah hian Minister te chu Assembly Committee ah an tel a rem loh lainn, tun Ministry a Minister of State dinhmun ang pek, Adviser to CM mi 4 te chu Assembly committee ah an tel bawka, Ethics committee ah Govt. Chief Whip te leh Minister te tel a rem loh lainn Deputy Chief Whip leh Minister, an vaiin mi 4 an tel bawka ti a, hetiang Assembly committee hrang hranga Minister leh MLA te an tel tam chuan, thil dik lo chhuitu tur ber Committee chu a din chhan ang a nih phak loh an hlauh avangin Assembly Speaker hnenah siam tha turin an ngen tih a sawi a, MLA te hetiang mawhpurhna tam zawk an pe duh a nih pawhin mawhpurhna tam zawk an chel theihna dan chu siam tha zawk mai turin an ngen tih a sawi bawka ni.

<><><>

GUJARAT

Gujarat sawrkar chuan Rajkot-a TRP game zone kang thubuaiah police officer pahnih tiamin official pasarih an hna atangin a chawhltir. Chief Minister Bhupendra Patel chuan kangmei rapthlak tak chhuak kha heng official pasarihte inthlahdah vang a ni tih sawiin an hna atanga chawhltir nghal turin thupek a chhuah a. Gujarat sawrkar pawhin vanduin thleng chungchangah hian thubuai ziaklutin Gujarat High Court Special bench-a Justice Biren Vaishnav leh Justice Devan Desai ten an ngaihtuah dawn a ni.

Thudawn danin Inrinnia TRP game zone kangah khan mi 30 aia tlem lo an thi a. Special Investigation Team (SIT) Additional Director General kaihhruai chuan vanduin thleng kha a chhui zui nghal a ni.

<><><>

DR, JAISHANKAR ON PAPUA NEW GUINEA LANDSLIDE

External Affairs Minister Dr. S. Jaishankar-a chuan Papua New Guinea-a leimin avanga mi tam tak an thi chu pawia tih thu a sawi. Social Media-a a thu dahah Pu Jaishankar-a chuan Papua New Guinea mipui leh sawrkar te India mipuiten an tawrhpu takzet a ti a. An hun harsa tawh mekah tanpui turin a inpeih reng a ni a ti. Papua New Guinea-a zirtawpniia leimin nasa tak hian mi 2000 chuang a chhilh niin sawrkar thuneitute chuan United Nations an hrilh a. Vanduin thlenna hmun hi Enga province-a Kaokalam khuaah a ni a. Chenna in 1100 chuang leiminin a chhilh a ni. Mulitaka Province ah pawh thingtlang khaw parukah leimin nasa avang hian harsatna an tawka ni. Papua New Guinea hi Australia hmarlama awm thliarkar a ni a. Hnam chi hrang hrang awmna niin tawng chi 800 chuang hman a ni a. Mihring maktaduai 10 vel an cheng a ni.

<><><>